

आकाशवाणी जयपुर-अजमेर

प्रादेशिक समाचार

- केंद्रीय मंत्रिमंडल बारह नुवा ग्रीनफील्ड औद्योगिक स्मार्ट शहर बणावण री मंजूरी दीनी-योजना मांय जोधपुर अर पाली ई शामिल
- चिकित्सा ऊं जुड़्या कर्मचारियां री हिफ़ाजत तैय करण सारू बणायी ज्या राष्ट्रीय कार्यबल री मीटिंग मांय राज्यां रा मुख्य सचिवां अर पुलिस महानिदेशकां सागे चर्चा करी ज्यीं
- अपराध नियंत्रण, कानून व्यवस्था अर जनसुरक्षा ऊं जुड़्या मुद्दां माथे राज्य पुलिस रा आला अहलकारां रो दो दिन रो सम्मेलन काल जयपुर मांय सरू व्हेलां
- राज्य रा न्यारा-न्यारा बांधां मांय पाणी लगातार आ रह्यो है-बीसलपुर बंधा मांय पाणी रो लेबल 314 दशमलव 3 आर एल मीटर तांई पूग्यो

000

केंद्रीय मंत्रिमंडल राष्ट्रीय औद्योगिक गलियारा विकास कार्यक्रम रा तैत बारह नुवा ग्रीनफील्ड औद्योगिक स्मार्ट शहर बणावण री मंजूरी दे दीनी हैं सूचना अर प्रसारण मंत्री अश्विनी वैष्णव आज नई दिल्ली मांय कैबिनेट री मीटिंग पाछे खबरनवीसां ने आ जाणकारी दीनीं वे बतायो के अ औद्योगिक हलका विकसित करण रा काम माथे करीब 28 हजार छह सौ दो करोड़ रुपया रो खर्च आवण रो अनुमान हैं वैष्णव बतायो के आं परियोजनावां ऊं सीधा तौर ऊं दस लाख अर अप्रत्यक्ष तौर ऊं 30 लाख नौकरियां रा मौका बणेलां राष्ट्रीय औद्योगिक गलियारा विकास कार्यक्रम रा तैत प्रदेश रा जोधपुर अर

पाली ने औद्योगिक स्मार्ट शहर रा तौर ऊं विकसित कर्या जावेलं
आं दोन्यू शहरां सारू ईं काम ऊं नौकरी धंधा रा 40 हजार मौका
मिल सकेलां केन्द्रीय मंत्रिमंडल 234 और शहरां मांय गैर-सरकारी
हलका रा 730 एफएम चैनल सरू करण सारू ई-नीलामी करावण रो
प्रस्ताव मंजूर कर लीनो हैं मंत्रिमंडल केन्द्रीय क्षेत्र री योजना कृषि
अवसंरचना कोष ने और बधावो देवण री मंजूरी ई दे दीनीं

000

चिकित्सा कर्मियां री हिफाजत सारू बणायी ज्या राष्ट्रीय कार्यबल री
आज नई दिल्ली मांय मीटिंग व्हीं मीटिंग मांय केंद्रीय गृह सचिव अर
स्वास्थ्य सचिव राज्यां रा मुख्य सचिवां अर पुलिस महानिदेशकां सागे
वीडियो कॉन्फ्रेंसिंग रे जरिये चर्चा कीनीं चिकित्सा पेशेवरां री
हिफाजत अर वां रा काम री ठौड़ रा हालात मांय सुधार रा बारा मांय
सुझाव देवण बाबत् सुप्रीम कोर्ट ओ कार्यबल बणायो हैं स्वास्थ्य
मंत्रालय एनटीएफ को सुझाव शीर्षक ऊं एक राष्ट्रीय पोर्टल बणायो है
ज्यीं माथे कोई ई सुझाव दे सके हैं

000

राज्यपाल हरिभाऊ किसनराव बागड़े बीकानेर जिला मांय पाकिस्तान ऊं
लाग्योड़ी सरहद माथे बी.एस.एफ. री साँचू पोस्ट ने हिफाजत रा लिहाज
ऊं घणी खास बतायी हैं वे आज साँचू पोस्ट रो दौरा कर र बीएसएफ रा
जवानां सागे मुलाकात कीनीं ई मौके राज्यपाल कह्यो के सरहद रा
पहरेदार रा तौर ऊं काम कर रह्या बीएसएफ रा जवानां बीचे आवणो
माथो ऊंचो करण री बात हैं

राज्यपाल पुलिस, बीएसएफ, फौज अर सीआईडी समेत न्यारी-न्यारी
एजेंसियां रा अहलकारां सागे मीटिंग कर र सरहदी हलकां मांय गैर
कानूनी खुदाई अर नशीली चीजां री तस्करी रोकण बाबत् पूरी सावचेत
राखण सारू कह्यो राज्यपाल साँचू माता मिंदर मांय दर्शन ई कीना अर
सैलाणियां सारू विकसित करी ज्या म्यूजियम ने ई निरख्यो राज्यपाल
सीमा चौकी कने "एक पेड़ मां के नाम" अभियान रा तहत पौधा ई रोप्यां
राज्यपाल गोडू रा सामुदायिक स्वास्थ्य केंद्र रो दौरा ई कीनो अर मरीजां
ऊं बातचीत कर र न्यारी-न्यारी जाणकारियां हासिल कीनीं वे गोडू रा
पीएम श्री राजकीय उच्च माध्यमिक विद्यालय रा विद्यार्थियां सागे ई
बातचीत कीनीं

000

प्रदेश मांय अपराधां माथे काबू करण, कानून व्यवस्था बणायी राखण अर जनता री हिफाजत ऊं जुड्या मुद्दा माथे पुलिस रा आला अहलकारां रो दो दिन रो सम्मेलन काल जयपुर मांय सरू व्हेलांपुलिस महानिदेशक उत्कल रंजन साहू बतायो के मुख्यमंत्री भजनलाल शर्मा 'पुलिसिंग विद एक्सीलेंस-द वे फॉरवर्ड' मुद्दा माथे राख्या जावण वाळा ई खास सम्मेलन रो उद्घाटन करेलां अतिरिक्त पुलिस महानिदेशक मालिनी अग्रवाल बतायो के ई सम्मेलन मांय न्यारा-न्यारा सत्रां मांय विशेषज्ञ जाणकारियां साझा करेलां

.....

000

प्रदेश मांय एक सितम्बर ऊं "राष्ट्रीय पोषण माह" मनायो जावेलं समेकित बाल विकास सेवा निदेशक ओपी बुनकर बतायो के महिलावां अर बच्चां रो बेहतर स्वास्थ्य अर पोषण तैय करण सारू ई अभियान रा तैत एनीमिया, पूरक आहार, पोषण भी पढाई भी, बेहतर शासन के लिए तकनीकी उपाय अर पर्यावरण संरक्षण रा मुद्दा तैय करी ज्या हैं

.....

000

पाकिस्तान ऊं आ र लम्बा बगत ऊं बाड़मेर मांय रहवास कर रह्या तीन जणां ने जिला कलेक्टर निशान्त जैन आज भारत री नागरिकता रा कागजात सूंप्यां जिला कलेक्टर वां रा दफ्तर मांय सागर बाई, जयपाल सिंह अर अजमल सिंह ने नागरिकता रा कागजात सूंप्या पछे भारत री नागरिकता ऊं जुडी शपथ दिरायीं भारत री नागरिकता मिलण परां अ लोग घणा राजी निजर आयां

000

शाहपुरा मांय नौजवानां री मदद सारू रा जिला जिला प्रशासन री ओर ऊं आज साईपेट मोबाइल ऐप री सरूआत करी ज्यीं ई रे मार्फत नौजवान जिला स्तर रा अहलकारां सागे सीधी बातचीत कर सकेलां जिला कलेक्टर राजेन्द्र सिंह शेखावत आ जाणकारी दीनीं वे बतायो के साईपेट मोबाइल ऐप रे मार्फत जनता जिला ऊं जुडी घटनावां री जाणकारी हासिल कर सकेलां जिला कलेक्टर बतायो के प्रतियोगी

परीक्षावां री तैयारी करण वाळा नौजवानां ने ई एप रे जरिये सामान्य ज्ञान , रणनीति अर उमाव बधावण वाळा वीडियो समेत नौकरी—धंधा रा मौकां री ताजा जाणकारी मिल सकेलां

साईपेट मोबाइल ऐप गूगल प्ले स्टोर ऊं डाउनलोड कर्यो जा सकेलां

000

राज्य रा न्यारा—न्यारा जिलां मांय टाबरियां ने खुद री हिफाजत करण री सिखावण देवण सारू शिक्षा विभाग री ओर ऊं सात दिन रा शिविर लगाया जा रह्या हैं डीग जिला री सरकारी बालिका सीनियर सेकेंडरी स्कूल मांय लगाया जा रह्या शिविर मांय महिला शारीरिक शिक्षकां ने आ सिखावण दी जा रही हैं म्हाणी खबरनवीस बतायो सिखावण लियां पाछे अ अध्यापिकावां वां री स्कूलां मांय टाबरियां ने खुद री हिफाजत री सिखावण देवेलां

000

प्रदेश मांय केई ठौड़ां चोखो मेह बरस्यो हैं सिरोही जिला रा माउंटआबू अर श्रीगंगानगर मांय कठे—कठे 70 ऊं 90 मिलीमीटर तांई पाणी बरस्यो श्रीगंगानगर अर हनुमानगढ़ जिला मांय आज ई जोरदार बिरखा व्हीं चूरू, भरतपुर अर धौलपुर ऊं ई बिरखा रा समाचार मिल्या हैं ई बीचे प्रदेश रा न्यारा—न्यारा बंधां मांय लगातार पाणी आ रह्यो हैं टोंक जिला रा बीसलपुर बंधा मांय पाणी रो लेवल बध र 314 दशमलव 3 आर एल मीटर व्हे ग्यो हैं मौसम विभाग रे मुजब आज बाड़मेर अर जैसलमेर जिला मांय केई ठौड़ां जोरदार बिरखा रा आसार हैं महकमो आवता 48 घंटा मांय भरतपुर, जयपुर अर उदयपुर संभाग मांय कठे—कठे बिरखा रा आसार जताया हैं महकमो कोटा, उदयपुर अर भरतपुर संभाग मांय 2 सितंबर ऊं बिरखा मांय ओजू बधोतरी व्हेवण अर कठे—कठे घणी जोरदार बिरखा रा आसार जताया हैं ई बीचे गुजरात मांय बरस रह्या जोरदार मेह रे कारण प्रदेश मांय ई रेलों री आवण—जावण माथे असर पड़्यो हैं उत्तर पश्चिम रेलवे रा मुख्य जनसम्पर्क अधिकारी कैप्टन शशि किरण बतायो के लारला दो दिन मांय उत्तर पश्चिम रेलवे री 12 गाड़ियां रद्द कर करणी पड़ी हैं गुजरात मांय वड़ोदरा मंडल री एक पुलिया माथे पाणी भर जावण रे कारण उत्तर

पश्चिम रेलवे री 21 गाड़ियां ने दूजा गेलां ऊं चलायी जा रही है जद के 9 रेलां आंशिक तौर ऊं रद्द कर दीरीजी हैं

000

साल 2024 रा पैरालंपिक खेल औपचारिक तौर ऊं आज रात फ्रांस री राजधानी पेरिस मांय सरु व्हे रह्या हैं 8 सितंबर तांई चालण वाळा आं खेलां मांय भारत रा 84 खिलाड़ी सिरकत कर रह्या हैं उद्घाटन जळसा मांय 2022 रा एशियाई पैरा खेल मांय चांदी रो तमगो जीतण वाळी शॉटपुट खिलाड़ी भाग्यश्री जाधव अर भाला फेंक होड़ मांय मौजूदा विश्व-रिकॉर्ड धारी सुमित अंतिल भारत रो झंडो ले र चालेलां पैरालंपिक रा इतिहास मांय ओ भारत रो सब ऊं मोटो दल है अर भारत रा खिलाड़ी 12 खेलां मांय होड़ करेलां आ खेलां मांय भारत रा एथलीट पैरा साइक्लिंग, पैरा जूडो अर पैरा रोइंग मांय पहली दफा चुनौती पेश करेलां कालकृष्ण नागर पुरुष एकल पैरा बैडमिंटन होड़ मांय जद के अवनि लेखरा अर मनीष नरवाल पैरा निशानेबाजी मांय भारत री चुनौती पेश करेलां

ई सागे ई तीरंदाजी, साइक्लिंग, ताइक्वांडो, तैराकी अर टेबल टेनिस री होड़ां मांय ई भारत रा पैरा खिलाड़ी देश री चुनौती पेश करेलां 30 अगस्त ऊं सरु व्हेवण वाळी एथलेटिक्स री न्यारी-न्यारी होड़ां मांय भारत रा 38 एथलीट सिरकत करेलां 2020 रा टोक्यो पैरालंपिक री भाला फेंक होड़ मांय सोना रो तमगो जीतण वाळा सुमित अंतिल अर टेबल टेनिस मांय भाविना पटेल भारत री चुनौती पेश करेलां भारत री पहली पैरालम्पिक पदक विजेता भाविना, सोनल बेन पटेल सागे महिलावां री टेबल टेनिस होड़ रा डबल्स मुकाबला मांय भारत री चुनौती पेश करेलां

000